

**Pineqaatissinneqarsimasunut inissiisarfinni isumannaarinnermut atortunik  
atuineq pillugu nalunaarut  
(isumannaarinnermut atortut pillugit nalunaarut)**

Kalaallit Nunaanni pinerluttulerineq pillugu inatsimmi, tak. inatsit nr.1045,7. Septemberimeersoq 2017, inatsisikkut nr, 572-kkut 10.maj 2022-meersumik allanngortinneqartumi aalajangersarneqarput:

*Atuuffissaa*

**§ 1.** Pinerluttulerineq pillugu inatsimmi §§ 224 aamma 225-mi maleruaqqusat malillugit paffequtit savimerngit, isumannaarinnermut inissiat, tassunga ilanngullugu aalanaveersitsineq inissitanut atorneqarsinnaapput.

*Paffequtit savimerngit atorneqartarnerannut maleruaqqusat immikkut ittut*

**§ 2.** Inissitap sumiiffimmit sumiiffimmut allamut nuunneqarneranut atatinnagu paffequtit savimerngit atorneqarneranni inissitaq sulisunit akulikitsumik aammalu akunnerup affaanik sivilisunerunngitsumik akulikitsigisumik nakkutigineqassaaq.

*Imm. 2.* Inissitap angallanneqarnerani paffequtit savimerngit atorneqassanersut naliliinermi ilaatigut makku pingaartinneqassapput:

- 1) pineqaatissiissutip sivilisussusia,
- 2) politiinit paasissutissat,
- 3) inissitap pissusilersortarnera pillugu paasissutissat,
- 4) angallassinermut tunngavigineqartoq aammalu
- 5) siusinnerusukkut isertitsivimmiinnermit paasissutissat.

**§ 3.** Paffequtit savimerngit Pinerluttunut Isumaginnittoqarfiup pisortaanit akuerineqartut kisimik atorneqarsinnaapput.

*Imm. 2.* Piffissami sivilisunerusumi angallassisoqassatillugu paffequtit savimerngit qitequtaasartallit angallassinermi atorneqassanersut inissiiffimmit isumaliutigineqartariaqarpoq.

*Imm. 3.* Paffequtit savimerngit qitequtitallit atorneqassatillugit pisuni tamani ataasiakkaani tamanna isumannaarutitut naammannersoq nalilerneqartassaaq.

*Isumannaarinnermut inissiat, tassunga ilanngullugu aalanaveersitsinerup  
atorneqartarnerat pillugu maleruaqqusat immikkut ittut*

**§ 4.** Nakkutilliinnermut inissiamut aammalu isumannaarinnermut inissiamut inissiisoqartillugu inissiiffiup misissussavaa inissitaq pigisanik sunik tigummisaqarnerasoq, tak. pinerluttulerineq pillugu inatsimmi § 221, imm. 1, imm. 3 aammalu imm. 4.

*Imm. 2.* Aammattaaq isumannaarinnermut inissiamut inissiisoqartillugu inissitaq allanik atisalerneqartassaaq.

*Imm. 3.* Nakkutilliinermut iissiamut inissisoqartillugu pisuni ataasiakkaani pisariaqartoq nalilerneqarpat allanik atisaliisoqarsinnaavoq.

**§ 5.** Inissitaq aalanaveersimatinneqartoq aalajangersimasumik nakkutilliisoqartinneqassaaq.  
*Imm. 2.* Pisuni inissitaq aalanaveersimatinneqartinagu pineqartoq sulisunit akulikitsumik alakkarneqartassaaq.

**§ 6.** Aalanaveersitsineq aatsaat pisariaqarluinnaraangat ullormit unnuamillu ataatsimit sivisunerusumik pisinnaavoq.

**§ 7.** Isumannaarinermut inissiat Pinerluttunut Isumaginnittoqarfiup pisortaanit akuerineqartut kisimik atorpeqarsinnaatitaapput.

*Imm. 2.* Inissiaq isumannaarinermut inissiatut akuerineqartoq pissutsit immikkut illuinnartut pisariaqartilinnigipassuk siunertanut allanut atoqusaanngillat.

*Isumannaarinermut atortunik allanik atuineq pillugu maleruaqqusat immikkut ittut*

**§ 8.** Isumannaarinermut inissiamut inissiinissamut piumasaaqatit naammassineqarsimappata inissiamilli taamaattumik inissiiffimmi peqanngippat tamatumunnga taarsiullugu inimi isersimaartarfimmi pequtit piarlugit utaqqiisaasumik inissisoqarsinnaavoq.

*Imm. 2.* Pisariaqarluinnartillugu inissiinermi paffequtit savimerngit atorpeqarsinnaapput.

*Imm. 3.* Imm. 1-imi taaneqartutut inissiinissamut periarfissaqanngippat tamatumunnga taarsiullugu paffequtit savimerngit atorpeqarsinnaapput.

*Imm. 4.* Imm. 1-3-mi taaneqartutut isumannaarinermi atortut sapinngisamik sivikinnerpaamik atorpeqartassapput.

**§ 9.** § 8 naapertorlugu inissiinermi § 4, imm. 1 aamma 2 aammalu § 5, imm. 2 assinganik atorpeqassapput.

*Nakorsamik qaaqqusineq, nakorsamit misissorneqarneq, nalunaarusiortarneq il.il. pillugit ataatsimut maleruaqqusat*

**§ 10.** Paffequtit savimerngit atorpeqarnerini nakorsaq qaaqquneqassaaq paffequtit savimerngit atorpeqartillugit inissitaq napparsimasorineqarpat, tassunga ilanngullugu ajoqusigaasimappat imaluunniit inissitap nammineq nakorsamit ikiorneqarnissani qinnutigippagu, taamaattorli tak. imm. 3, oqaaseqatigiit aappaanni pisoq taaneqartoq.

*Imm. 2.* Aalanaveersaartinneqarluni aalanaveersaartinneqaraniluunniit isumannaarinermut inissiat atorpeqarneranni pinerluttulerineq pillugu inatsimmi § 225, imm. 4 aamma 5-imi maleruaqqusat malillugit nakorsamik qaaqqusisoqartassaaq nakorsarlu misissuissalluni.

*Imm. 3.* § 8, imm. 1-ip atorpeqarnerani pinerluttulerineq pillugu inatsimmi § 225, imm. 5 malillugu nakorsamik qaaqqusisoqartassaaq. Pisut § 8, imm. 2 aamma 3-mi

taaneqartut malillugit paffequtit savimerngit atorneqartillugit inissiisarfiup nakorsaq ingerlaannartumik qinnuigissavaa inissitaq misissoqullugu. Nakorsap pineqartoq misissussavaa, taamaallaat misissussanagu nakorsaq isumaqarpat taamatut misissuineq pisariaqanngitsoq.

*Imm. 4.* Isumannaarinermit atortut ullormit unnuamillu ataatsimit sivisunerusumik atortinneqarpata nakorsaq ullut tamaasa ilisimatinneqartassaaq, taamaalilluni nakorsap pineqartup inissitamik ilisimasaqarnini aallaavigalugu nakorsamit misissorneqarnissaa pisariaqarnerisooq nalilersinnaaniassammagu.

**§ 11.** Paffequtit savimerngit, isumannaarinermit inissiat, tassunga ilanngullugu aalanaveertitsinerup isumannaarinermit atortut allat atorneqarnerat pillugu nalunaarusiornissamat immersuiffissiaq immikkut ittoq atorlugu sapinngisamik piaartumik inissiiffik nalunaarusiortassaaq. Nalunaarusiap imarissavai atuinermit tunngavilersuutigineqartoq, isumannaarinermit atortut atorneqarunnaarneranni ulloq nalunaaqutarlu kiisalu Pinerluttunut Isumaginnittoqarfiup pisortaanut naammagittaalliorsinnaanermut periarfissaaq pillugu aammalu naammagittaalliorinissamat piffissarititaq qaqugukkut atorunnaassanersoq pillugu inissitaq ilisimatinneqarsimanersoq pillugit paasissutissat, tak. pinerluttulerineq pillugu inatsimmi § 245, imm. 1. Aammattaaq nalunaarusiap imarissavai nakorsami misissuisitsinissaaq pillugu inissiisarfiup isumaliutai pillugit paasissutissat kiisalu nalunaarut manna malillugu nalunaaruteqarneq.

*Imm. 2.* Inissitaq imm. 1-imi nalunaarusiap taaneqartup nuutinneranik qinnuteqarnermigut tunineqassaaq, taamaattorli tak. imm. 3.

*Imm. 3.* Suliamut tunngasunik takunnissinnaatitaaneq pisortat ingerlatsineranni suliat suliarineqartarnerannut inatsit naapertorlugu killilerneqarsinnaavoq, tassunga ilanngullugu inissitap imaluunniit inuit allat pisortalluunniit soqutigisaannut, assersuutigalugu inissiiffiup isumannaatsuunissaa imaluunniit inunnik ataasiakkaanik illersuinissaaq eqqarsaatigalugu inissitap imminut iluaqutissami isumaginissaanut nalunaarusiamik atuisinnaanermik soqutiginninnera aalajangiisuutinneqartussatut isigineqarsinnaalluni.

**§ 12.** Kinaluunniit inissitamik isumannaarinermit inissiami inissinneqartumik nakkutilliisooq imaluunniit § 8-mik atueqquneqartoq nakkutilliineq pillugu nakkutilliinermut atatillugu immersuiffissiami allakkiussaaq, inissitamut atatillugu pissutsit allannguuteqarnerat apeqquaatinnagu. Aalanaveertillugu inissitamik nakkutilliisup aalajangersimasup nakkutilliineranut aamma tamanna atuuppoq. Piffissami inissitap isumannaarinermit inissiami aalanaveertinneqarnerani sivikinnerpaamik minutsit 15-it tamaasa nakkutilliineq pillugu allakkiortoqartassaaq.

*Imm. 2.* Nakkutilliineq pillugu immersuiffissiap imarissavai nakkutilliinermit ulloq nalunaaqutarlu pillugit paasissutissat kiisalu inissitap qanoq innera pillugu paasissutissat, tassunga ilanngullugu nakkutilliinermut inissiamiititsinerup imaluunniit isumannaarinermit inissiamiititsinerup, aalanaveertitsinerup imaluunniit § 8-mik atuinerup ingerlatiinnarneqarnissaanik pisariaqartitsineq pillugu oqaaseqaataasinnaasut.

*Imm. 3.* Isumannaarinermit inissiamiititsinerup ingerlatiinnarneqarnissaa imaluunniit ullunit unnuanillu pingasunit sivisunermik § 8-p atorneqarnissaa imaluunniit aalanaveertitsinerup nalunaaquttap akunneri 24-t sinnerlugit ingerlatiinnarneqarnissaa pillugit aalajangiisoqarpat tamanna pillugu inissiisarfik Pinerluttunut Isumaginnittoqarfiup

pisortaanut ingerlaannartumik nalunaaruteqassaaq. Nalunaarutip imarissavaa inissinneqarnerup ingerlatiinnarneqarnissaanut piumasaqaatit naammassineqartutut isigineqarnerannut tunngavilersuut erseqqinnerusoq aammalu nuutinnera § 11 naapertorlugu nalunaarusiamut aammalu imm. 1 aamma 2-mi nakkutilliinermut atatillugu immersuiffissiamut ilanngunneqassalluni.

*15-17-inik ukiullit isumannaarinermut inissiamut inissinneqartut pillugit  
maleruaqqusat immikkut ittut*

§ 13. 15-17-inik ukiulik isumannaarinermut inissiamut qaqutigoortumik inissinneqarpat inuusuttup aalanaveertinneqarnerusoq aalanaveertinneqannginersorluunniit apeqqutaatinnagu inissiiffiup nakorsaq ingerlaannartumik qinnuigissavaa inuusuttoq misissoqqullugu. Nakorsap inuusuttoq misissussavaa, taamaallaat misissussanagu nakorsaq isumaqarpat taamatut misissuineq pisariaqanngitsoq.

*Imm. 2.* Nalunaaquttap akunneri 24-t sinnerlugit isumannaarinermut inissiamiititsinerup ingerlatiinnarneqarnissaa pillugu aalajangiisoqarpat tamanna pillugu inissiisarfik Pinerluttunut Isumaginnittoqarfiup pisortaanut ingerlaannartumik nalunaaruteqassaaq. Nalunaarutip imarissavaa inissinneqarnerup ingerlatiinnarneqarnissaanut piumasaqaatit naammassineqartutut isigineqarnerannut tunngavilersuut erseqqinnerusoq aammalu nuutinnera § 11 naapertorlugu nalunaarusiamut § 12, imm. 1 aamma 2 naapertorlugit nakkutilliinermut atatillugu immersuiffissiamut.

*Oqartussaaffik*

§ 14. Paffequtit savimerngit atorineqarnissaat isumannaarinermut inissiamut inissiinissaq, tassunga ilanngullugu aalanaveertitsinissaq imaluunniit § 8-p atorineqarnissaa kiisalu atortulersuutit taakku atorunnaarneqarnissaat pillugit inissiisarfiup aqutsisua imaluunniit inuk tamatumunnga piginnaatitaasoq aalajangiissaaq.

*Imm. 2.* Pisuni ataasiakkaani pissutsit pissutaallutik imm. 1 malillugu inuup piginnaatitaasup aalajangiinissaa utaqqineqarsinnaatinnagu sulisoq alla aalajangiissaaq. Pisuni taamaattuni imm. 1 malillugu inuk piginnaatitaasoq pisut pillugit piaartumik nalunaaruteqassaaq.

*Atuutilerfissaa*

§ 15. Nalunaarut ulloq 1. Juli 2022 atuutilerpoq.

*Imm.2. Nalunaarut nr.1163 7. december 2009-meersoq atorunnaarpoq*

*Kalaallit Nunaanni Pinerluttunik Isumaginnittoqarfik, ulloq 1. juli 2022*

Christian Høygaard